



29. juli 2009

Inatsisartut Suleriaasianni § 36 imm. 1 naapertorlugu Naalakkersuisunut apeqqutit imaattut matumuuna saqqummiuppakka:

Tasiilami inuusuttut ilinniarnissaannut periarfissat pillugit apeqqut.

- 1. Tasiilami inuusuttut qassit 2009-mi meeqqat atuarfianni naammassisimasut ilinniagaqalersimappat?**
- 2. Tasiilami inuusuttut qassit 2009-mi meeqqat atuarfianni naammassisimasut suliffissaarusimasutut nalunaarsorneqarsimappat?**
- 3. Inuusuttut suliffinnik sungiusarfissarsiortut nuttarnersinnaanermut aningaasaateqarfimmit ikiorserneqarsinnaappat?**
- 4. Tasiilami avinngarusimasunilu allani suliffinnik sungiusarfissaaleqineq aaqqiiviginiarlugu suliffissaqarnikkut ilinniartitaanikkullu iliuusissanik sunik Naalakkersuisut eqqarsaatersuuteqarpat?**
- 5. Inuusuttut isorliunerusunngaanneersut iluamik periarfissinneqarsinnaanissaat siunertaralugu illoqarfinni anginerusuni suliffissanik sungiusarfissaqarnissaat, kiisalu Nuummi illoqarfinnilu allani anginerusuni ilinniartut ineqarfiinik sanaartornissaq Naalakkersuisunit eqqarsaatigineqarsimava?**

(Inatsisartuni ilaasortaq Akitsinnguaq Olsen, Inuit Ataqatigiit)

Tungavilersuut:

Tasiilami inuusuttut aatsaat taama amerlatigisut ilinniaqqikkusullutik qinnuteqarsimasut tusagassiorfitsigut ukioq manna julip qaammataani tusarliunneqarpoq. Tamanna tusarlugu nuananaajallannarpoq, taamaattorli aamma tusagassiorfitsigut tusarliunneqarpoq Tasiilami inuusuttut ilarpasui inuusuttunut inuutissarsiornermullu ilinniartinnit aallartikkusullutik qinnuteqarsimagaluartut itigartinneqartariaqassagunartut.

Tusagassiorfiit najoqquralugit Tasiilami suliffinnik sungiusarfissanik periarfissat killeqarnerujussui pissutaatinneqarpoq. Ajornartorsiullu tamanna anigorneqanngippat inuusuttorpasuiit meeqqat atuarfiannit qimatsinerminni ingerlaannaq suliffissaaleqineq misigisussaassavaat, naak ilinniaqqinnissaminnik kissaateqaraluarlutik.

Oqartuarpugut inuusuttortavut nunatta pissuussutaanni pingaarnerpaanerarlugit. Tamannalu iluoorukkutsigu inuusuttut pisariaqarteqisatsinnik ilinniagaqarusuttut periarfissittariaqarpagut.

Tamakku tungavigalugit apeqqutit Naalakkersuisunit ullut suliffiit qulit iluanni akineqarnissaat kissaatigissavara.